

ХФР

1918-йил
21-йундан чиқа
бoshлаган

№29, 2023-йил
2-avgust,
chorshanba (32.775)

Ўзбекистон ОВОЗИ

Ijtimoiy-siyosiy gazeta

Barchaga g'amxo'rlik — davlatning burchi

ГЕОЛОГИЯ ТАРМОҚЛАРИДАГИ ҚЎШИМЧА ИМКОНИАТЛАР КЎРСАТИБ ЎТИЛДИ

Президент Шавкат Мирзиёев 1 август кун фойдали қазилмалар захираси ва ишлаб чиқариш ҳажмини кўпайтиришга оид тақдимот билан танишди.

Мамлакатимизда геология соҳасига катта эътибор қаратилиб, замонавий технологиялар жорий қилинган натижасида ерости бойликларини аниқлаш кўлами кенгайди. Уларни қазиб олиш ва қайта ишлаш лойиҳаларига хорижий инвестициялар кириб келмоқда.

Хусусан, сўнгги олти йилда каолинни қайта ишлаш бўйича 148 миллион долларлик 15 та янги лойиҳалар ишга тушган. Натижада тайёр маҳсулот ишлаб чиқариш ҳажми қарийб 2 баробар кўпайиб, экспорт 65 миллион долларга етган. Шу даврда кўмир қазиб чиқариш ҳажми 1,4 баробар ошиб, 5,4 миллион тоннага етган.

Тақдимотда шу соҳадаги, жумладан, кўмир, каолин ва уран ҳажмини оширишга қаратилган режалар ҳақида ахборот берилди.

Қайд этилганидек, бу йил 6,7 миллион тонна кўмир қазиб олиш режа қилинган.

Каолин бўйича қиймати 620 миллион долларлик 33 та лойиҳа амалга оширилмоқда. Ундан юқори қўшилган қийматли маҳсулотлар ишлаб чиқариш ҳисобига жорий йилда экспортни 81 миллион долларга, 2030 йилга бориб 180 миллион долларга етказиш мўлжалланган.

Шунингдек, уран захирасини ўстириш бўйича хорижий компаниялар билан ҳамкорликда геология-қидирув ишлари давом эттирилади.

Давлатимиз раҳбари мутасаддиларга бу йўналишларда натижадорликни янада ошириш имкониятларини кўрсатиб ўтди. Мавжуд хом ашё базаси, ноёб технологиялар ва кадрлар салоҳиятидан унумли фойдаланиб, маҳсулотлар ҳажмини кўпайтириш вазифаси қўйилди.

Сурхондарёдаги тошкўмир бўйича 5 та истиқболли майдонни хусусий секторга бериб, геология-қидирув ишларини жадаллаштириш, Ангренда қазиб олинган кўмир сифатини яхшилаш ва саралаш технологияларини жорий этиш бўйича кўрсатма берилди.

Янги каолин конларини топиш ва оқ каолин захирасини 200 миллион тоннага етказиш, уни қайта ишлаш лойиҳаларини кўпайтириш зарурлиги таъкидланди.

Гидротермал ва қора сланецли уран конларини ўзлаштиришга хорижий инвесторлар жалб қилиниши белгиланди.

president.uz



2-3

ЎЗБЕКИСТОН 2030 СТРАТЕГИЯСИ

КОСОНЛИКЛАР ФАЙРАТ-ШИЖОАТИ ЮКСАЛИШГА ҚАНОТ БЎЛМОҚДА

“ВАЪДАНИ БАЖАРДИК...”

Косон саноат-монтаж қурилиш фирмаси соҳиби 33 ёшли Машраб Шодмонов шундай дейди:

— Президентимиз ўтган йили апрелда туманимизга келиб, “Дўстлик” маҳалласида янги уйлар, мактаб ва бошқа иншоотлар қуриш юзасидан кенгаш ўтказганларида мен ҳам қатнашдим. Давлатимиз раҳбари уйлар лойиҳасининг ўзига хослиги, сифат ва бошқа масалалар юзасидан қимматли маслаҳатлар бердилар. Шунчалар таъсирландимки, беихтиёр ўрнимдан туриб кетганимни сезмай қолибман. “15 хонадонга ўз ҳисобимиздан уй қуриб берамиз”, дедим. “Кам бўлманг!”, дедилар. Қаттиқ меҳнат қилдик. Президент сайлови арафасида кўп қаватли уйни қуриб битказдик. Мухтож оилаларни ҳам ўзимиз танладик. Ваъдамизни бажарганимиздан жамоамиз билан қувоняпмиз...



Давоми 4-5-бетларда. ▶

ҚОНУНЛАР ХАЛҚНИНГ ҚАЛБИДИР



6 САҲИФА

“ЎЗБЕКИСТОН ОВОЗИ” 105 ЁШДА



8

АБИТУРИЕНТЛАР УЧУН ДАСТЛАБКИ ТЕСТ СИНОВЛАРИ БЎЛИБ ЎТДИ

1 август кун абитуриентлар учун мамлакатимиздаги олий ўқув юртларига кириш бўйича тест синовлари бўлиб ўтди.

Олий таълимдаги ижобий ислохотлар талабаларнинг тест синовларида ҳам ўзифодасини топмоқда. Олий таълим, фан ва инновациялар вазирлиги ҳузуридаги Билим ва малакаларни баҳолаш агентлиги томонидан бу йилги тест жараёнларида қизгин тайёргарлик кўрилди.

Бу жиҳатлар “Ўзэкспомарказ” миллий кўргазмалар мажмуасида бўлиб ўтган тест жараёнларида ҳам ўзининг ёрқинифодасини топди. Абитуриентлар ҳали тест бошланишидан анча илгари ўз жойларини эгалладилар. Уларнинг тест синовларини топшириши учун мажмуадаги тегишли павильонларда зарур шароит-

лар яратиб берилгани диққатга сазовордир. Имтиҳон жараёни махсус кузатув камерасига ёзиб олинаётгани, бинолар керакли техник ва хавфсизлик воситалари билан таъминлангани эътиборли.

...Тест синовлари бошланди. Абитуриентларнинг тестларни ишлаши учун уч соат вақт белгиланган бўлса-да, айримлар синовлар бошланганидан 15-20 дақиқа ўтар-ўтмас тест топшириб чиқётганига гувоҳ бўлиш мумкин эди.

Тест синовларининг дастлабки босқичи муваффақиятли, белгиланган талаб ва меъёрларга мос тарзда ўтди. Нима бўлганида ҳам, билимли, масъулиятли, ҳалол ва садоқатли, фидойи абитуриентларнинг талабалар сафидан ўрин олишига тилақдошимиз.

ЎЗА.

ИНФЛЯЦИЯ КУТИЛГАНИДАН КЎРА СЕКИНРОҚ



7 САҲИФА

Лойиҳа — умумхалқ муҳокамасида

ЎЗБЕКИСТОН СТРАТЕГИЯСИ

Келгуси 7 йилда мамлакатимизнинг асосий ривожланиш йўналишларини белгилаб берувчи «Ўзбекистон – 2030» стратегияси ва уни 2023 йилда амалга ошириш чора-тадбирлари лойиҳалари жорий йилнинг 31 июлидан бошлаб regulation.gov.uz ва 2030.strategy.uz порталларида кенг жамоатчилик муҳокамаси учун жойлаштирилди.

«Ўзбекистон – 2030» стратегиясининг мақсадлари ва самарадорлик кўрсаткичлари осон қабул қилиш ва тушуниш учун қулай шаклда ифодаланган бўлиб, унда 5 та йўналиш бўйича 100 та мақсад назарда тутилган.

Хурматли юртдошларимиз, Халқ демократик партияси депутатлари ва фаолларидан лойиҳаларнинг муҳокамасида фаол иштирок этиб, мамлакатимиз тараққиётига хизмат қиладиган таклифларни regulation.gov.uz ва 2030.strategy.uz порталларига юборишларини сўраймиз.

✓ I. ҲАР БИР ИНСОНГА ЎЗ САЛОҲИЯТИНИ РЎЁБГА ЧИҚАРИШИ УЧУН МУНОСИБ ШАРОИТЛАРНИ ЯРАТИШ

✓ Болаларни мактабгача таълим ва тайёрлов гуруҳлари билан қамров даражасини 100 фоизга етказиш.

✓ 100 фоиз мактабгача таълим ташкилотларини тоза ичимлик суви ва замонавий санитария-гигиена инфратузилмаси билан таъминлаш.

✓ Ўқув ўринлари сонини 7,5 миллионгача етказиш.

✓ 208 та "Истеъдод – Интилиш – Истикбол" номли мактаб-интернатлар ташкил этиш.

✓ Таълим ташкилотларига ҳар йили 500 нафар "тил эгалари" бўлган хорижий мутахассисларни жалб этиш.

✓ 1 минг нафар тарбиячи ва ўқитувчиларни хорижий мамлакатларга малака ошириш ва стажировкага юбориш.

✓ Мактабгача ва умумий ўрта таълим муассасалари педагог ходимларининг иш ҳақини 2 баробар ошириш.

✓ Олис ва чекка ҳудудларда жойлашган 715 та умумий ўрта таълим муассасалари ўқув-

чилари учун бепул мактаб автобусларини йўлга қўйиш.

✓ Давлат гранти асосидаги қабул параметрларини 2 баробарга ошириш.

✓ Бюджетдан тиббиётга ажратиладиган йиллик маблағ ҳажминини 2 баробар ошириш.

✓ 700 та поликлиника барпо этиш, 28 минг шифо ўринларини яратиш, 16 минг шифокор штатларини ташкил этиш.

✓ Ижтимоий хизматларни мажмуавий амалга ошириш учун республиканинг барча ҳудудларида "Инсон" ижтимоий хизматлар марказлари фаолиятини ташкил қилиш.

✓ Олий маълумотли хотин-қизлар улушини 50 фоизга етказиш.

✓ 2026 йилга қадар камбағалликни 2 баробарга, 2030 йилга қадар эса кескин қисқартириш.

✓ Ҳар йили 500 нафар истеъдодли ёшларни хорижий энг нуфузли олийгоҳларига давлат ҳисобидан ўқишга юбориш.



✓ II. БАРҚАРОР ИҚТИСОДИЙ ЎСИШ ОРҚАЛИ АҲОЛИ ФАРОВОНЛИГИНИ ТАЪМИНЛАШ

✓ Ялпи ички маҳсулот ҳажмини 160 миллиард долларга ва аҳоли жон бошига даромадларни 4 минг долларга етказиш.

✓ Йиллик инфляция даражасини 5-6 фоиздан ошмаслигини таъминлаш.

✓ Саноатда қўшилган қиймат ҳажмини 45 миллиард долларга етказиш ва 2,5 миллионга юқори даромадли иш ўринларини яратиш.

✓ Мамлакатимизда 250 миллиард долларлик инвестицияларни амалга ошириш

✓ Банкларни хусусийлаштириш ва давлат ихтиёрида 3-4 та банкни сақлаб қолиш, банк бозорига камида 4 та йирик нуфузли чет эл банкларини жалб қилиш.

✓ Камида 3 та тижорат банкларида Исломо молияси мезон ва тартибларини жорий этиш.

✓ Қайта тикланувчи энергия манбаларини 25 минг мега-ваттга

ҳамда жами истеъмолдаги улушини 40 фоизга етказиш.

✓ Жамоат транспортини тўлиқ экологик тоза ёқилғига ўтказиш.


✓ Электр энергиясини ишлаб чиқариш ҳажминини 118 миллиард кВтга етказиш.

✓ Табиий газ қазиб олиш ҳажминини 62 миллиард куб метрга етказиш.

✓ Республиканинг 6 та йирик аэропортини модернизация қилиш ва хусусий авиакомпаниялар сонини 10 тага етказиш.

✓ Иқтисодиётда нодавлат сектор улушини 85 фоизга етказиш, давлат улуши мавжуд 2,3 мингта корхоналар сонини 6 баробарга камайтириш.

✓ Республикада 17 турдаги давлат монополиясини бекор қилиш.



✓ Ҳар йили 1 миллиондан ортиқ нуронийлар учун республика бўйлаб диққатга сазовор жойлар, хусусан, тарихий шаҳарлар, қадимий обидалар, зиёратгоҳлар ва юртимизнинг сўлим гўшаларига саёхатлар ташкил этилади.



✓ III. СУВ РЕСУРСЛАРИНИ ТЕЖАШ ВА АТРОФ-МУҲИТНИ МУҲОФАЗА ҚИЛИШ

✓ Сув ишлатиш самарадорлигини 25 фоизга ошириш, барча экин майдонларини тўлиқ сув тежайдиган технологияларга, ички суғориш тармоқларининг 50 фоизини ёпиқ қувурли суғориш тизимларига ўтказиш.

✓ 18,7 минг км ёки 66 фоизи тупроқ ўзанли бўлган магистрал ва хўжаликлараро каналларнинг бетон қопламали улушини 13,1 минг км га ёки 46 фоизга етказиш.

✓ Қишлоқ хўжалиги экинларини суғоришда сув тежайдиган технологиялар билан қамраб олинган ерларнинг умумий майдонини 2 млн гектаргача, шу жумладан,

томчилаб суғориш технологиясини 600 минг гектаргача етказиш.

✓ Камида 100 та йирик сув хўжалиги объектларида автоматлаштирилган бошқарув тизимини жорий қилиш.

✓ Юқори самарадорликка эга чанггаз тозалаш ускуналари ва локал сув тозалаш иншоотларини ўрнатиш ҳамда мавжудларини модернизация қилиш, 14 та ҳудудда экологик тоза ҳудуд режимини жорий қилиш.

✓ Шаҳарлар бош режаларини тузишда улар ҳудудининг камида 30 фоизини яшил майдонлар ташкил этилишини таъминлаш.

Лойиҳа — умумхалқ муҳокамасида

2030



✓ IV. ҚОНУН УСТУВОРЛИГИНИ ТАЪМИНЛАШ, ХАЛҚ ХИЗМАТИДАГИ ДАВЛАТ БОШҚАРУВИНИ ТАШКИЛ ЭТИШ

✓ Аҳоли ташаббуси билан инфратузилмани яхшилашга ажратиладиган маблағларни 24 триллион сўмга етказиш.

✓ Маҳалланинг маблағларини аҳолининг овозига кўра, маҳаллалардаги инфратузилма лойиҳаларига йўналтириш амалиётини жорий қилиб, маҳаллаларнинг муаммоларини ҳал этиш учун ажратиладиган маблағлар миқдорини камида 3 баробар кўпайтириш.

✓ Маҳаллаларда 100 дан ортиқ давлат хизматларини "бир қадам"да кўрсатишни йўлга қўйиш.

✓ Маҳаллаларда аҳоли билан ишлашга қаратилган жараёнларни 100 фоиз рақамлаштириб, ҳар бир маҳаллада "электрон хизмат нуқталари"ни ишга тушириш.

✓ Маҳаллий давлат ҳокимияти вакиллик органларини халқнинг чинакам "овозига" айлантириш.

✓ Ҳокимларнинг маҳаллий Кенгашга раҳбарлик қилиш амалиётини тўлиқ бекор қилиш.

✓ Худуддаги аҳоли сонидан келиб чиқиб ҳар бир маҳаллий Кенгашда 5 тагача доимий асосда фаолият юритувчи профессионал депутатлар корпусини шакллантириш.

✓ Вилоят ва туман (шаҳар) даражасидаги ҳокимликлар вазифа ва функцияларининг аниқ чегарасини белгилаш.

✓ Маҳаллий ижро ҳокимияти органларини демократик тамойиллар асосида шакллантириш, шу жумладан, ҳокимларни сайлаш тизимини жорий этиш ва уларни муддатидан олдин лавозимидан озод этишнинг ҳуқуқий асосларини яратиш.

✓ Ҳокимликлар ва вазирликлар бўлинмаларининг бир-бирини такрорловчи 70 дан ортиқ функцияларини оптималлаштириш.

✓ Ҳокимликларга юклатилган 500 дан ортиқ вазифа орасидан улар фаолиятига хос бўлмаганларини бекор қилиш.

✓ Икки ва ундан ортиқ полосали тартибга солинмаган пиёдалар ўтиш йўлакларини светофорлар билан тўлиқ жиҳозлаш.

✓ Ярашувга тушадиган ишлар бўйича жабрланувчининг илтимосига асосан жиноят ишини қўзғатмасдан суд тартибда тугатиш амалиётини жорий қилиш.

✓ Тадбиркорлик субъектларига нисбатан кўрилатган жиноят ишларининг 100 фоизида ҳимоячи ёки жамоат ҳимоячиси иштирокини таъминлашга эришиш.

✓ "Буюк тарих" номли 100 қисмдан иборат ҳужжатли сериал ишлаб чиқариш ва у жаҳоннинг энг машҳур 5 та телеканалида намойиш этилади.



Интернет жаҳон ахборот тармоғидан тўсиқларсиз фойдаланиш учун зарур шарт-шароитларни яратиш, миллий Интернет маконида киберхавфсизликни таъминлаш ҳамда фуқароларнинг Интернетдан фойдаланиш борасидаги саводхонлигини ошириш.



» **Журналист ва оммавий ахборот воситаларининг ҳуқуқларини ҳимоя қилиш тизимини такомиллаштириб, уларнинг профессионал фаолиятига тўсқинлик қилганлик учун жавобгарлик кучайтирилади.**

✓ V. МАМЛАКАТНИ ХАВФСИЗ ВА ТИНЧЛИКСЕВАР ДАВЛАТГА АЙЛАНТИРИШ ИШЛАРИНИ ДАВОМ ЭТТИРИШ

✓ Марказий Осиёда халқаро ҳуқуқ ва минтақадаги барча давлатлар миллий манфаатларини инобатга олган ҳолда, кенг қамровли стратегик шериклик ва иттифоқчилик муносабатларини чуқурлаштириш.

✓ Марказий Осиё давлатлари ҳудудида фуқаролар эркин ҳаракати, шунингдек, товарлар, хизматлар ва капиталнинг сунъий чекловларсиз айланишига босқичма-босқич эришиш, шунингдек, умумий сайёҳлик маконини шакллантириш ишларини давом эттириш.

✓ Европа мамлакатлари билан савдо-иқтисодий, молиявий, инвестициявий ва технологик ҳамкорликни ривожлантириш,


✓ Жанубий Осиё, Яқин ва Ўрта Шарқ, Африка минтақасидаги мамлакатлар билан мавжуд алоқаларни яна-

да кенгайтириш, янги ва истиқболли йўналишларда ўзаро манфаатли ҳамкорликни йўлга қўйиш, кенг минтақаларни боғловчи ва Ўзбекистонни жаҳон бозорига чиқишига имкон яратувчи транспорт-логистика йўлакларини шакллантириш.

✓ Америка мамлакатлари, хусусан, АҚШ билан янги даврда стратегик шериклик ва ҳар томонлама ҳамкорлик алоқаларини тобора кенгайтириш, инвестиция, экспорт ва илғор технологиялар соҳаларидаги алоқаларни кучайтириш.

✓ Миллий қонунчиликни ва ҳуқуқни қўллаш амалиётини Жаҳон савдо ташкилотининг қоида, меъёр ва битимларига мослаштириш.

✓ Жаҳон савдо ташкилотига аъзо давлатлар билан бозорларга кириш бўйича музокараларни тизимли олиб бориш ва аъзо бўлиш жараёнини самарали якунига етказиш.



HAMKASBLARIMIZ

+34 Корақалпоғистон Республикаси
+39 Хоразм

+35 Бухоро
+40 Навоий

+35 Тошкент
+40 Самарқанд
Жиззах
Сирдарё

+37 Қашқадарё
+42 Сурхондарё

+34 Андижон
+39 Наманган
Фарғона

+38 Тошкент
+40 шаҳри


t.me/uzbekiston_ovozi_gazetasi

facebook.com/uzbekistonovozi

instagram.com/uzbekiston_ovozi

info@uzbovozi.uz

www.uzbovozi.uz



“ЎЗБЕКИСТОН”
МЕҲМОНХОНАСИДА
ЎЗБЕКИСТОН ХАЛҚ
ДЕМОКРАТИК ПАРТИЯСИ
МАРКАЗИЙ КЕНГАШИ
МУАССИСЛИГИДАГИ
“ЎЗБЕКИСТОН ОВОЗИ”
ГАЗЕТАСИНИНГ 105 ЙИЛЛИК
ЮБИЛЕЙИГА БАҒИШЛАБ
АДАБИЙ-БАДИИЙ БАЙРАМ
ТАДБИРИ ЎТКАЗИЛДИ.
ШУ КУНИ ГАЗЕТАНИНГ
ФАХРИЙЛАРИ, ФИДОЙИЛАРИ,
ДАВЛАТ ВА ЖАМОАТ
АРБОБЛАРИ, БУГУНГИ
КУНИМИЗНИНГ ЕТУК
ҚАЛАМКАШЛАРИ БИР ДАВРА
АТРОФИДА ЙИҒИЛИБ,
ГАЗЕТАНИНГ БОСИБ ЎТГАН
УЗОҚ МАШАҚҚАТЛИ ЙЎЛИ
ВА БУГУНГИ ФАОЛИЯТИ,
МАТБУОТ НАШРЛАРИ
ОЛДИДА ТУРГАН
МАСЪУЛИЯТЛИ ВАЗИФАЛАР
ҲАҚИДА ДИЛДАН СУҲБАТ
ҚУРИШДИ.

Ўзбекистон Халқ демократик партияси Марказий Кенгаши раиси, Олий Мажлис Қонунчилик палатаси спикери ўринбосари Улуғбек Иноятлов, Ўзбекистон Фахрийларни ижтимоий қўллаб-қувватлаш “Нуруний” жамғармаси бошқаруви раисининг биринчи ўринбосари Шароф Убайдуллаев, сиёсий фанлар доктори, профессор Нарзулла Жўраев, “Халқ сўзи” газетаси Бош муҳаррири ўринбосари Шухрат Жабборов ва бошқалар йиғилганларни ўзига хос қутлуғ сана билан табриклаб, мамлакатимиз ижтимоий-сиёсий ҳаётида “Ўзбекистон овози” газетасининг ўз ўрни, мавқеи ва таъсири борлигини таъкидлашди.

Уч авлод учрашувига айланиб кетган тадбирда фахрийлар газета босиб ўтган йўл, миллий матбуот тарихи, халқимиз-

“ЎЗБЕКИСТОН ОВОЗИ” 105 ЁШДА

нинг фидойи журналистлари ва зиёлилари тахририятнинг фаолиятини замонга муносиб равишда ривожлантириш ҳақида фикр-мулоҳазаларини билдиришди.

Маълумки, газета биринчи марта 1918 йил 21 июнда, “Иштирокиюн” номи билан босилган. Газета Ўзбекистондагина эмас, бутун Туркистон ўлкасида биринчи миллий матбуот нашрлари қаторида намоён бўлган.

1920 йил 12 декабрдан “Қизил байроқ”, кейинроқ “Туркистон”, 1924 йил декабрдан бошлаб “Қизил Ўзбекистон”, 1964 йилдан “Совет Ўзбекистони”, 1991 йилдан, яъни мамлакатимиз мустақиллигининг илк кунларидан бошлаб, ҳозиргача “Ўзбекистон овози” номи билан чоп этилмоқда.

Юртимизнинг кейинги 100 йиллик тарихи ушбу газета саҳифаларида муҳрланган. Газета узоқ, оғир йўлни катта курашлар билан босиб ўтди. Ҳар қандай шароитда ҳам миллий қадриятларимизни, манфаатларимизни ҳимоялашга ҳаракат қилди.

Газета ўзligидан узоқлашмаган. Миллий қадриятларимиз, буюк тарихимизни эслатиб турадиган, бошига кўтарадиган ва бу туйғуларни ўз ижодлари орқали матбуот саҳифаларига олиб чиқадиган фидойи ижодкорлар газета жамоасида ҳамма вақт бўлган.

Турли давр ва йиллар давомида бу газетага Акмал Икромов, Шароф Рашидов, Иброҳим Раҳим, Зиёд Есенбоев, Мақсуд Қориев сингари машҳур давлат, жамоат арбоблари ва ижодкорлар Бош муҳаррир бўлишган. Ғафур Ғуллом, Мақсуд Шайхзода, Ойбек, Пиримқул Қодиров, Муҳаммад Юсуф, Саъдулла Ҳаким, Азим Суюн, Сафар Остонов ва бошқа кўплаб таниқли публицист, шоир, ёзувчилар ушбу тахририятни бошқарган, ишлаган, газетанинг фаол муаллифларидан бўлишган.

Газетада ишлаб тобланган, тажриба ортирган бир гуруҳ журналист-публицистлар



» **Юртимизнинг кейинги 100 йиллик тарихи ушбу газета саҳифаларида муҳрланган. Газета узоқ, оғир йўлни катта курашлар билан босиб ўтди. Ҳар қандай шароитда ҳам миллий қадриятларимизни, манфаатларимизни ҳимоялашга ҳаракат қилди.**

давлат ва жамият бошқарувининг турли бўғинларида, масъул вазифаларда самарали меҳнат қилган. Шу маънода “Ўзбекистон овози” тахририяти мамлакат матбуотининг ўзига хос кадрлар мактаби сифатида ҳам эътироф этилади.

Кейинги йилларда газета турли қийинчиликларни энгиб ўтиб, эмин-эркин фаолият юритмоқда, янги режалар тузмоқда. Мамлакат бошқарувини янада демократлаштириш, сиёсий плюрализм, профессионал парламент, вакиллик ҳокимиятини мустаҳкамлаш, ҳуқуқлар ва имкониятлар тенглигига эришиш, ижтимоий бирдамлик ва ҳимоя, инсон қадр-қиммати каби мавзулар газетанинг асосий принциплари бўлиб қолмоқда.

Байрам тадбири якунида йиғилганлар ушбу даргоҳда ишлаган барча устозларни, ҳамкасбларни, муаллифларни газета фаолиятидаги тарихий кун билан қутлашди, фаол ҳамда фахрий журналистларга тахририятнинг эсдалик совғалари топширилди.



МУАССИС:

O'zbekiston ovozi

ТАХРИР HAY'ATI:

Ulug'bek INOYATOV

Ulug'bek VAFOYEV

Maqsuda VORISOVA

Qalander ABDURAHMONOV

Guliston ANNAQILICHEVA

Muslihididdin MUHIDDINOV

Hayotxon ORTIQBOYEVA

Shuhrat ISLOMOV

Toshtemir XUDOYQULOV

Бoш муҳаррир: То'лиқин ТО'РАХОНОВ

MANZILIMIZ: 100135, Toshkent, Bunyodkor shoh ko'chasi, 50 «A»-uy.

Телефонлар: (71) 239-12-14

Реклама бўлими: (91) 190-19-49. E-mail: uzbovozi@mail.ru

«Sharq» nashriyot-matbaa aksiyadorlik kompaniyasi

bosmaxonasida chop etildi.

Korxonaning manzili: Buyuk Taron ko'chasi, 41-uy.

Gazeta ofset usulida, A-2 formatida bosildi. Hajmi — 4 bosma taboq.

Gazeta O'zbekiston Matbuot va axborot agentligida 0006-raqam bilan 2007-yil 11-yanvarda ro'yxatga olingan.

Navbatchi: **Ravshan SHODIYEV**

Sahifalovchi: **Bekzod ABDUNAZAROV**

Г — 836. 6789 nusxada bosildi.

Nashr ko'rsatkichi — 220.

t — Tijorat materiallari

O'za yakuni —

Topshirilgan vaqti — 21:30

1 2 3 4 5 6

Sotuvda kelishilgan narxda

Gazeta haftaning chorshanba kuni chiqadi. «O'zbekiston ovozi» materiallarini ko'chirib bosish faqat tahririyat ruxsati bilan amalga oshiriladi.